

**DEMOKRATSKA NARODNA ZAJEDNICA
BOSNE I HERCEGOVINE
S A R A J E V O**

S T A T U T

Oktober 2005. godine

Na osnovu odredbi Zakona o političkim organizacijama ("Sl. list RBiH", br. 27/91), i Odluke o privremenom prenosu ovlasti sa Kongresa na Izbornu skupštinu DNZ BiH, Izborna skupština Demokratske narodne zajednice Bosne i Hercegovine na zasjedanju održanom 01.10 2005. godine usvojila je:

S T A T U T

Demokratske narodne zajednice Bosne i Hercegovine

I – OSNOVNE ODREDBE

Član 1.

Demokratska narodna zajednica Bosne i Hercegovine je samostalna, demokratska, multietnička politička stranka, čiji su ciljevi izraženi u Programu i Programskim načelima, a koja na osnovu Ustava BiH, Zakona o političkim organizacijama i na osnovu ovoga Statuta djeluje na cijelom području Bosne i Hercegovine.

Član 2.

Statutom Demokratske narodne zajednice Bosne i Hercegovine uređuje se naziv i sjedište, znak i druga obilježja stranke, pravni status, predstavljanje i zastupanje, ciljevi i način djelovanja, članstvo, unutrašnji odnosi, unutrašnja organizacija i oblici djelovanja, organi upravljanja (način izbora i opoziva, trajanje mandata, te način odlučivanja), sredstva za rad i materijalno-financijsko poslovanje, osnovni akti i način donošenja, prestanak rada Stranke i sudbina imovine nakon prestanka rada, kao i druga pitanja od značaja za članstvo i djelovanje Stranke.

1. Naziv i sjedište

Član 3.

Naziv stranke je: Demokratska narodna zajednica Bosne i Hercegovine (u daljem tekstu: DNZ BiH).

Skraćeni naziv stranke je: DNZ BiH.

Član 4.

Sjedište DNZ BiH je u Sarajevu.

Član 5.

Odluku o promjeni naziva i sjedišta donosi Kongres DNZ BiH.

2. Znak i druga obilježja

Član 6.

DNZ BiH ima znak, zastavu, himnu i pečat.

Odluku o obliku, sadržaju i načinu upotrebe znaka, zastave, himne i drugih obilježja donosi Glavni odbor DNZ BiH.

Član 7.

Pečat DNZ BiH je okruglog oblika promjera 35 mm sa tekстом **Demokratska narodna zajednica Bosne i Hercegovine** koji prati rub pečata, a u sredini pečata nalazi se znak Stranke.

Član 8.

Pečat imaju i organizacijski oblici DNZ BiH koji je identičan pečatu DNZ BiH, s tim što se u drugom krugu ruba pečata upisuje naziv i sjedište organizacionog oblika.

Odluku o izradi, upotrebi i čuvanju pečata donosi Predsjedništvo DNZ BiH na prijedlog Generalnog sekretara.

3. Pravni status

Član 9.

DNZ BiH je samostalna, neprofitna politička organizacija koja svojstvo pravne osobe stječe upisom u Registar političkih stranaka pri nadležnom tijelu državne uprave na način utvrđen zakonom.

Član 10.

DNZ BiH ima status samostalne pravne osobe, ima svoj žiro-račun i devizni račun, a u pravnom prometu s trećim osobama za preuzete obaveze odgovara svim svojim sredstvima i cjelokupnom imovinom.

4. Predstavljanje i zastupanje

Član 11.

DNZ BiH u javnom i političkom radu, predstavlja i zastupa predsjednik/predsjednica u skladu s Programom, ovim Statutom i zakonskim propisima Bosne i Hercegovine.

U slučaju privremene spriječenosti predsjednika/predsjednice, Stranku predstavlja i zastupa jedan/jedna od potpredsjednika, kojeg/kuju za to ovlasti predsjednik/predsjednica, a u njegovoj/njenoj nemogućnosti Predsjedništvo ovlasti posebnom odlukom.

Predsjednik/predsjednica može ovlastiti osobu za zastupanje Stranke pred sudskim i državnim organima koja je za to kvalificirana i to na osnovu posebne punomoći, kojom se određuju obim i granice zastupanja.

Član 12.

U okviru prava i ovlaštenja utvrđenih odlukom o osnivanju regionalnih, kantonalnih i općinskih organizacija, Stranku predstavljaju i predsjednici/predsjednice tih organizacija.

II – CILJEVI I NAČIN DJELOVANJA

Član 13.

Polazeći od svoga Programa DNZ BiH se u svom djelovanju zalaže za sveobuhvatan razvoj Bosne i Hercegovine kroz:

- izgradnju Bosne i Hercegovine kao demokratske države ravnopravnih konstitutivnih naroda i svih ostalih građana koji u njoj žive;
- izgradnju bosanskohercegovačkog društva na osnovama evropskih demokratskih dostignuća, vladavine prava, sloboda i solidarnosti;
- afirmaciju suvereniteta, teritorijalnog integriteta i nezavisnosti Bosne i Hercegovine u skladu sa međunarodnim pravom;
- uspostavu društva čije će institucije, u funkcionalnom smislu, služiti građanima;
- uvažavanje i ostvarivanje osnovnih prava i sloboda čovjeka i građanina, u skladu sa međunarodnim konvencijama, neovisno o njegovoj nacionalnoj, vjerskoj i spolnoj pripadnosti ili političkom uvjerenju;
- afirmaciju osnovnih vrijednosti koje daju obilježja kvaliteta ljudskog života, zaposlenje i adekvatnu naknadu za rad, kvalitetno obrazovanje, zdravstvenu zaštitu, kvalitetnu izgradnju infrastrukturnih objekata (putevi, vodovod, snabdijevanje električnom energijom, sredstva suvremene komunikacije, profesionalni i neovisni mediji i sl.);
- uspostavu tržišne privrede i stvaranje uvjeta za stalni razvoj i bolje uvjete življenja građana po evropskim i svjetskim standardima;
- praćenje i analiziranje rada državnih organa, te nosilaca javnih i društvenih funkcija;
- ostale aktivnosti utvrđene Programom i odlukama Kongresa i drugih organa stranke.

Član 14.

DNZ BiH može dodjeljivati priznanja i nagrade za doprinos u realizaciji programa i afirmaciji Stranke.

Priznanja i nagrade, te način njihove dodjele, utvrđuje Predsjedništvo stranke posebnom odlukom.

Član 15.

DNZ BiH može biti član međunarodnih asocijacija čije je djelovanje u skladu sa programskim načelima DNZ BiH.

Odluku o učlanjenju u međunarodne asocijacije donosi Glavni odbor na prijedlog Predsjedništva.

Član 16.

Rad DNZ BiH je javan, a ostvaruje se javnim djelovanjem, obavještanjem članstva i javnosti putem saopćenja, konferencija za štampu, prisustvom predstavnika medija na skupovima Stranke i slično.

Javnost se iz rada Stranke može izuzetno isključiti kad se raspravlja i odlučuje o:

- unutrašnjim kadrovskim pitanjima;
- strategiji i taktici izborne kampanje i kandidiranju izbornih kandidata;
- spajanju, odnosno udruživanju sa drugim strankama, i dr.

III – ČLANSTVO

Član 17.

Članom/članicom DNZ BiH može, pod jednakim uslovima propisanim ovim Statutom, postati svaki/svaka punoljetna, poslovno sposobna osoba, državljanin/državljanica Bosne i Hercegovine, ukoliko nije član/članica druge političke stranke i ukoliko izrazi spremnost da ispunjava obaveze utvrđene ovim Statutom i Programom DNZ BiH.

Članom/članicom stranke postaje se potpisivanjem pristupnice i upisom u registar članova DNZ BiH.

Registar svih članova vodi Centralni ured DNZ BiH pod nadzorom Generalnog sekretara stranke, a svaki oblik organizovanja Stranke vodi registar članova za područje svog djelovanja.

Sud časti može osporiti upis u registar članova Stranke.

Član 18.

Prijem novih članova/članica u DNZ BiH mogu izvršiti svi organi na svim nivoima organiziranja Stranke.

Potpisana pristupnica dostavlja se nadležnoj općinskoj organizaciji u kojoj novoprimljeni član/članica ima prebivalište.

Prijem novih članova/članica može osporiti svaki član/članica DNZ BiH i svaki organ stranke na osnovu obrazloženih argumenata i priloženih dokaza kojima se dokazuje da bi njihovo članstvo bilo u suprotnosti sa Statutom i Programskim načelima Stranke.

Prigovor se dostavlja organu koji je izvršio prijem u roku od 30 dana od dana prijema. U slučaju da organ koji je izvršio prijem odbije prigovor kojim se osporava prijem, podnosilac prigovora ima pravo žalbe Nadzornom odboru u daljem roku od 30 dana.

Odluka Nadzornog odbora donesena po žalbi, konačna je i izvršna danom uručenja strankama u postupku.

Član 19.

O prijemu u članstvo DNZ BiH osoba koje su bile članovi/članice rukovodstva drugih političkih organizacija, ili su bile isključene iz DNZ BiH, odlučuje organ odgovarajućeg nivoa organizacije Stranke.

Član 20.

Ponovni prijem člana/članice koji/koja je brisan/brisana iz evidencije ili je bio/bila isključen/isključena, moguć je pod uvjetom da zahtjev za ponovni prijem bude postavljen od strane dotičnog/dotične i razmatran na organu općinske organizacije u kojoj se vodio/vodila na evidenciji.

U odluci o ponovnom prijemu može se odlučiti da ponovno primljeni član/članica tokom određenog perioda ne može vršiti nikakve funkcije u DNZ BiH ili u ime DNZ BiH, niti biti imenovan/imenovana ili izabran/izabrana u predstavničke i izvršne organe vlasti.

Za postupak osporavanja prijema iz prethodnog stava primjenjuju se odredbe člana 18. ovog Statuta.

Član 21.

Član/članica DNZ BiH svoja osnovna prava i obaveze ostvaruje u osnovnoj organizaciji prema mjestu prebivališta.

Ukoliko mu/joj je to onemogućeno, za ostvarivanje svojih prava se neposredno obraća višem organizacionom nivou DNZ BiH.

Član 22.

Svaki član/članica DNZ BiH dobiva člansku knjižicu Stranke čiju formu i izgled, propisuje Predsjedništvo stranke.

Član 23.

Svaki član/članica DNZ BiH djeluje u jednoj od osnovnih organizacija stranke.

U slučaju preseljenja iz mjesta stanovanja, član/članica se odjavljuje u matičnoj osnovnoj organizaciji Stranke i prijavljuje se u osnovnoj organizaciji Stranke u novom mjestu stanovanja.

Član 24.

Član/članica Stranke ima pravo:

- učestvovati u radu, birati i biti biran/birana, iznositi prijedloge, mišljenja i prigovore na rad Stranke i njenih tijela;
- učestvovati u odlučivanju, biti obaviješten/obaviještena o svim stavovima i odlukama Stranke;
- pokretati inicijative za rad Stranke i njenih tijela;
- javno iskazivati svoje mišljenje;
- slobodno iskazivati svoj nacionalni i vjerski identitet, uživajući pri tome punu slobodu.

Član 25.

Član/članica DNZ BiH ima dužnosti:

- da se zalaže i aktivno radi na ostvarivanju programskih ciljeva Stranke;
- da se pridržava Statuta i ostalih akata Stranke;
- da se zalaže za interese Stranke i čuva njen ugled;
- da provodi odluke Stranke, pri čemu je mjerodavna odluka višeg tijela DNZ BiH;
- da inicira i pridobija nove članove/članice;
- da uredno plaća članarinu.

Član 26.

Osnove stranačke discipline predstavlja izvršavanje dužnosti utvrđenih Programskim ciljevima i ovim Statutom, te pridržavanje općih pravila uljudnog ponašanja.

Nepridržavanjem pravila takvog ponašanja, član/članica ugrožava interese Stranke, što se razmatra i utvrđuje u postupku pred Sudom časti.

Član 27.

Članstvo u DNZ BiH prestaje:

- istupanjem člana/članice iz DNZ BiH,
- brisanjem iz evidencije članstva DNZ BiH,
- isključenjem iz Stranke i
- smrću člana/članice.

Svaki prestanak članstva upisuje se u Registar članova.

Član 28.

Član/članica DNZ BiH briše se iz evidencije:

- ako se kandiduje kao neovisni kandidat,
- ako pređe u drugu stranku ili pređe u nezavisne poslanike ili vijećnike,
- ako ne plaća članarinu neprekidno duže od 12 mjeseci.

Postupak za brisanje iz evidencije mogu pokrenuti skupština podružnice, Predsjedništvo općinskog ogranka i viši organi DNZ BiH.

Odluku o brisanju iz evidencije donosi Sud časti općinskog ogranka.

Odluka se donosi u pisanom obliku sa obrazloženjem.

Član/članica DNZ BiH može na odluku o brisanju iz evidencije u roku od 15 dana uložiti žalbu Sudu časti DNZ BiH.

Odluka Suda časti DNZ BiH je konačna i obavezujuća.

Član 29.

Član/članica DNZ BiH može biti isključen/isključena iz DNZ BiH u slučajevima:

- ako krši Program, Statut i druga akta DNZ BiH,
- ako od druge političke stranke prihvati kandidaturu za dužnost ili prihvati dužnost u zakonodavnoj, ili izvršnoj vlasti,
- ako se ne pridržava odluka organa DNZ BiH,
- ako je protiv njega/nje donesena pravomoćna presuda za krivična djela protiv osnovnih ljudskih prava, krivična djela protiv života i tijela i za teža krivična djela protiv imovine i imovinskih prava.

Za pokretanje postupka, utvrđivanje odgovornosti, izricanje mjere isključenja i nadležnosti organa DNZ BiH shodno se primjenjuju odredbe, koje se odnose na postupak brisanja iz evidencije.

Član 30.

Registrirani članovi DNZ BiH za svoje članstvo obavezni su plaćati članarinu.

Od ove obaveze oslobođeni su: đaci, studenti, nezaposleni, invalidi i penzioneri.

Visina članarine, način izmirivanja i druga pitanja vezana za članarinu, regulirat će se posebnom odlukom koju donosi Predsjedništvo DNZ BiH.

IV – UNUTRAŠNJI ODNOSI U DNZ BiH

Član 31.

S ciljem provjere i utvrđivanja volje svog članstva i jačanja njihovog uticaja na politiku i djelovanje DNZ BiH, o bitnim pitanjima politike i djelovanja Stranke, o bitnim pitanjima politike i razvoja, može se organizovati anketiranje članstva i općestranačka rasprava.

Odluku o provođenju ankete i općestranačke rasprave donosi Glavni odbor.

Za druge nivoe organizovanja Stranke, odluku o anketi donose odgovarajući odbori DNZ BiH, isključivo iz domena svog rada i za pitanja koja se tiču nivoa na kojem su organizovani, uz prethodno pribavljeno mišljenje o sadržaju ankete od strane Glavnog odbora Stranke.

U odluci o provođenju ankete utvrđuju se anketna pitanja, način provođenja i analiza ankete ili drugi oblik istraživanja mišljenja članstva.

Član 32.

U DNZ BiH je dozvoljeno pravo na javno iskazivanje manjinskog mišljenja.

Manjinsko mišljenje ne može biti u suprotnosti sa Programom Stranke.

U DNZ BiH nije dozvoljeno institucionaliziranje manjinskog mišljenja u organiziranom obliku, odnosno frakcijskom djelovanju.

Član 33.

Organi DNZ BiH punovažno odlučuju kada je prisutno više od polovine od ukupnog broja njihovih članova/članica, a Kongres, ako je prisutno više od dvije trećine od ukupnog broja delegata/delegatkinja.

Organi donose odluke većinom glasova prisutnih članova, osim ako za pojedina pitanja nije drugačije određeno.

Član 34.

Glasanje u organima DNZ BiH je u pravilu javno, ako za pojedina pitanja organ Stranke ne odluči da se provede tajno glasanje.

Izbor organa DNZ BiH vrši se tajnim glasanjem između više kandidata/kandidatkinja.

Član 35.

Mandatni period za sve čelne – inokosne dužnosti u DNZ BiH i na svim nivoima organizovanja, je četiri (4) godine.

Sve dužnosti u Stranci mogu se obavljati najviše u dva uzastopna mandatna perioda, izuzev dužnosti člana/članice u svim kolektivnim organima DNZ BiH, za koje važi ograničenje od najviše tri uzastopna mandatna perioda.

V – UNUTARNJA ORGANIZACIJA I ORGANI DNZ BiH

Član 36.

Članstvo DNZ BiH teritorijalno i funkcionalno se organizira u slijedeće oblike:

1. Općinske organizacije,
2. Gradske organizacije,
3. Kantonalne/regionalne organizacije i Distrikt Brčko,

4. Centralni organi Stranke.

U kantonima/regijama, gradovima, općinama i naseljima, u kojima postoje registrirani članovi Stranke, a gdje nisu osnovane organizacione jedinice DNZ BiH, kao privremeni oblik organizovanja, djeluju povjereništva ili povjerenici Stranke.

Član 37.

U DNZ BiH djeluje posebna organizacija mladih članova i simpatizera DNZ BiH pod nazivom Mladi DNZ BiH. Glavni odbor DNZ BiH donosi odluku o organiziranju Mladih DNZ BiH. Mladi DNZ BiH svojom odlukom o osnivanju bliže određuje način svog organiziranja, djelovanja i osnivanja interesnih oblika.

U DNZ BiH djeluje i posebna organizacija žena – članica i simpatizerki DNZ BiH pod nazivom Žene DNZ BiH. Glavni odbor DNZ BiH donosi odluku o organiziranju Žena DNZ BiH. Žene DNZ BiH svojom odlukom o osnivanju bliže određuju način svog organiziranja, djelovanja i osnivanja interesnih oblika.

U okviru DNZ BiH mogući su i drugi oblici interesnog organiziranja čije djelovanje mora biti u skladu sa Programom i Statutom DNZ BiH, što se odnosi i na organizacije iz stava 1. i 2. ovog člana i člana 38. ovog Statuta.

Član 38.

Svaki organizacioni nivo DNZ BiH može u sklopu svojih organa, a s ciljem efikasnijeg i kvalitetnijeg rada, formirati stručna tijela (komisije, savjete, timove i sl.).

1. Općinska organizacija sa podružnicama

Član 39.

Općinski ogranak DNZ BiH je osnovni oblik povezivanja i organiziranja članstva Stranke.

Područje djelovanja općinskog ogranka DNZ BiH odgovara u pravilu administrativno-teritorijalnom području.

Član 40.

Općinski ogranak DNZ BiH u skladu sa Programom i Statutom, djeluju samostalno na svom području, saglasno s općom politikom Stranke.

Član 41.

Članovi/članice DNZ BiH povezani u općinski ogranak, organiziraju se i djeluju u podružnicama osnovanim u naseljima, mjesnim zajednicama ili kvartovima grada na području općinskog ogranka u skladu s ovim Statutom i sa odlukom nadležnog organa Stranke.

Odluku o osnivanju općinskog ogranka sa ili bez podružnica, donosi Predsjedništvo Stranke. Za osnivanje Općinskog ogranka potrebno je prisustvo najmanje dvadeset (20) registriranih članova, sa mjestom prebivališta u općini za koju se osniva ogranak.

Član 42.

Organi općinskog ogranka su: skupština, predsjedništvo, predsjednik ogranka, nadzorni odbor i sud časti općinskog ogranka.

a) Skupština općinskog ogranka

Član 43.

Skupština je najviše tijelo općinskog ogranka.

U skupštinu općinskog ogranka po funkciji ulaze:

- članovi predsjedništva općinskog ogranka,
- predsjednik/predsjednica općinskog ogranka,
- predsjednici podružnica,
- vijećnici/odbornici općinskog vijeća/skupštine opštine,
- poslanici/zastupnici na višim nivoima vlasti,
- predstavnici Stranke u izvršnoj vlasti na svim nivoima,
- predsjednici interesnih asocijacija Stranke osnovanih na nivou ogranka.

Skupštinu općinskog ogranka čine i delegati izabrani na delegatskom principu srazmjerno broju članova DNZ BiH u podružnicama.

Odluku i kriterije o broju delegata iz podružnica donosi predsjedništvo ogranka prije sazivanja izborne skupštine ogranka.

Član 44.

Skupština općinskog ogranka ima slijedeće nadležnosti:

- utvrđuje ciljeve djelovanja radnih tijela općinske organizacije saglasno općim političkim načelima sadržanim u Programu, Statutu i drugim dokumentima DNZ BiH,
- tajnim glasanjem bira i razrješava.
 - predsjednika i zamjenika predsjednika skupštine,
 - predsjednika općinskog ogranka, koji je ujedno i predsjednik predsjedništva
 - članove predsjedništva, od kojih su prva dva sa najviše glasova potpredsjednici
 - članove/članice nadzornog odbora,
 - članove suda časti,
 - delegate općinskog ogranka za Kongres stranke,
- donosi poslovnik o radu skupštine,
- razmatra i usvaja izvještaj i program rada općinskog ogranka,
- razmatra i usvaja izvještaj predsjednika općinskog ogranka,
- razmatra i usvaja izvještaj o finansijskom poslovanju općinske organizacije,
- obavlja i druge poslove predviđene Poslovníkom i Statutom.

Član 45.

Sjednice skupštine općinskog ogranka održavaju se po potrebi, a najmanje jedanput godišnje. Rad skupštine odvija se po poslovniku kojeg donosi skupština.

Sjednice skupštine saziva i njima predsjedava predsjednik/predsjednica skupštine općinskog ogranka.

Ukoliko sjednica skupštine općinskog ogranka nije održana više od godinu dana, dužnost sazivanja izborne skupštine, u roku od tri mjeseca od proteka jedne godine, ima predsjednik/predsjednica kantonalnog odbora ili predsjednik DNZ BiH.

Poziv se šalje u pisanom obliku, najmanje osam dana prije održavanja skupštine.

Član 46.

Na zahtjev 1/5 članova općinskog ogranka ili na zahtjev predsjednika/predsjednice DNZ BiH, predsjednik skupštine dužan je sazvati vanrednu sjednicu skupštine u roku od 15 dana od dana prijema zahtjeva, sa dnevnim redom koji uključuje prijedlog dnevnog reda podnositelja zahtjeva za sazivanje vanredne skupštine.

Ako predsjednik/predsjednica skupštine ogranka ne sazove sjednicu skupštine u predviđenom roku, sjednicu je, u daljnjem roku od 30 dana, dužan/dužna sazvati predsjednik/predsjednica kantonalnog odbora ili predsjednik DNZ BiH.

Član 47.

Predsjednik/predsjednica predstavlja i zastupa općinski ogranak i po funkciji je predsjednik/predsjednica predsjedništva općinskog ogranka.

Predsjednik/predsjednica općinskog ogranka obavlja slijedeće zadatke:

- organizira političko djelovanje u skladu s Programom Stranke,
- potiče političku djelatnost, radi na organiziranju organizacije, brine se za materijalna i financijska sredstva, potiče i prati rad i izvršavanje zadataka radnih tijela općinske organizacije i podružnica,
- saziva i predsjedava sjednicama predsjedništva ogranka i prati izvršavanje odluka i zaključaka predsjedništva ogranka,
- obavlja i druge poslove utvrđene ovim Statutom i poslovnikom o radu skupštine.

Za obavljanje pojedinih stručnih poslova predsjednik/predsjednica može zadužiti bilo kojeg člana predsjedništva općinskog ogranka.

b) Predsjedništvo općinskog ogranka

Član 48.

Predsjedništvo općinskog ogranka čine:

- predsjednik/predsjednica općinskog ogranka,
- dva potpredsjednika predsjedništva, po mogućnosti iz reda različitih konstitutivnih naroda,
- predsjednik kluba vijećnika/odbornika općinskog vijeća/skupštine opštine,
- nosioci vlasti u općini/opštini iz reda DNZ BiH,
- predsjednik/predsjednica interesne organizacije mladih,
- predsjednica interesne organizacije žena,
- izabrani članovi predsjedništva tajnim glasanjem na izbornoj sjednici skupštine općinskog ogranka.

Predsjedništvo ogranka u sastav predsjedništva može kooptirati 1/3 novih članova u odnosu na broj izabranih članova/članica predsjedništva.
Odluku o kooptiranju novih članova/članica donosi predsjedništvo općinskog ogranka.

Član 49.

Predsjedništvo općinskog ogranka na svojoj prvoj konstituirajućoj sjednici bira:

- sekretara i
- blagajnika općinskog ogranka.

Član 50.

Sjednice predsjedništva ogranka saziva i njima predsjedava predsjednik/predsjednica, a u njegovoj/njenoj odsutnosti, jedan od potpredsjednika/potpredsjednica ogranka.

Član 51.

Ukoliko predsjednik/predsjednica općinskog ogranka podnese ostavku, funkciju vršioca dužnosti predsjednika/predsjednice obavljati će jedan/jedna od potpredsjednika/potpredsjednica kojeg/koju izaberu članovi predsjedništva ogranka većinom glasova.

Član 52.

Nadležnosti i ovlaštenja predsjedništva općinskog ogranka su sljedeće:

- organizira provođenje politike Stranke i izvršenje programa općinske organizacije,
- provodi odluke skupštine i odluke viših organa Stranke,
- potiče omasovljavanje članstva,
- analizira i zauzima stavove o aktuelnim političkim pitanjima na području svog djelovanja,
- organizira i vodi kontakte sa javnošću,
- potiče i organizira promotivne aktivnosti (tribine, manifestacije, skupove, medijske nastupe i sl.),
- utvrđuje kandidate/kandidatkinje za izbor u zakonodavna tijela na svim nivoima i za tijela Stranke,
- predlaže kandidate/kandidatkinje stranke za izbor u izvršne organe vlasti na nivou općine,
- organizira predizborne skupove,
- osniva i koordinira rad interesnih organizacija,
- izuzetno, po potrebi, kooptira članove predsjedništva, nadzornog odbora i suda časti,
- organizira i vodi tekuće poslove općinskog ogranka.

Član 53.

Podružnica se u pravilu osniva na području jedinice mjesne samouprave (mjesna zajednica, gradska četvrt, naselje) u općini u kojoj je osnovana općinska organizacija, a s ciljem uspostavljanja što svrsishodnije teritorijalne organizacije Stranke, te ostvarivanja politike mjesne samouprave.

Svaki općinski ogranak samostalno, u skladu s konkretnim uslovima, određuje broj i teritorijalno prostiranje podružnice, a odnos općinskog ogranka i podružnice regulira se posebnom odlukom općinskog ogranka.

Član 54.

Podružnica se osniva kada na njenom prostoru djelovanja, ima najmanje pet (5) članova DNZ BiH.

Broj članova skupštine, kao i druga pitanja od vitalnog značaja za rad određene podružnice, određuje predsjedništvo općinskog ogranka.

Skupština podružnice bira predsjednika/predsjednicu, sekretara/sekretaricu i blagajnika/blagajnicu, koji obavljaju sve organizacijske i tekuće poslove za podružnicu.

c) Nadzorni odbor općinskog ogranka

Član 55.

Nadzorni odbor kojeg imenuje skupština općinskog ogranka broji tri (3) člana.

Članovi/članice nadzornog odbora između sebe biraju predsjednika/predsjednicu i donose poslovnik o radu nadzornog odbora.

Nadzorni odbor ocjenjuje, da li su odluke i rad tijela i dužnosnika Stranke u saglasnosti sa zakonom, ovim Statutom i drugim propisima Bosne i Hercegovine, te da li se sredstvima Stranke raspolaže zakonito, uredno i namjenski.

Izvještaj o finansijsko-materijalnom poslovanju koji se podnosi na odobrenje nadležnom organu Stranke, mora biti praćen mišljenjem nadzornog odbora.

Član 56.

Ako nadzorni odbor općinskog ogranka nije izabran ili prestane djelovati iz bilo kojeg razloga, njegove dužnosti preuzima nadzorni odbor neposredno višeg nivoa organizovanja DNZ BiH.

d) Sud časti općinskog ogranka

Član 57.

Sud časti na nivou općinskog ogranka ima tri člana i tri zamjenika.

Sud časti iz svojih članova bira predsjednika.

Sud časti djeluje prema Pravilniku o sudovima časti kojeg donosi Glavni odbor Stranke.

2. Gradska organizacija

Član 58.

Gradska organizacija DNZ BiH osniva se na području gradova koji su ustrojeni kao jedinstvena gradska cjelina, sastavljena iz jedne ili više općina.

Član 59.

Gradska organizacija DNZ BiH organizirana iz više općina u svom radu primjenjuje način organizovanja, nadležnosti, prava i obaveze Kantonalnog odbora u skladu sa ovim Statutom.

Član 60.

Gradska organizacija DNZ BiH organizirana iz jedne općine u svom radu primjenjuje način organizovanja, nadležnosti, prava i obaveze općinske organizacije DNZ BiH u skladu sa ovim Statutom.

3. Kantonalna/regionalna organizacija

Član 61.

Kantonalna organizacija DNZ BiH ustrojava se na području kantona saglasno administrativno-teritorijalnom ustrojstvu Federacije Bosne i Hercegovine, odnosno na području regije, saglasno ustroju Republike Srpske.

Distrikt Brčko kao posebno administrativno-teritorijalna cjelina u okviru Bosne i Hercegovine, u organizaciji DNZ BiH ima status kantonalne organizacije.

Član 62.

Kantonalnu/regionalnu organizacije DNZ BiH čine općinske organizacije DNZ BiH na području kantona/regije.

Kantonalna/regionalna organizacija inicira podstiče i oživotvoruje politiku DNZ BiH, usklađuje djelovanje općinskih organizacija na svom području i izražava posebne interese sredine u kojoj djeluje, preko svojih predstavnika u zakonodavnim i izvršnim tijelima vlasti Bosne i Hercegovine.

Član 63.

Kantonalna/regionalna organizacija dužna je djelovati saglasno općim političkim načelima DNZ BiH, sadržanim u Programu, Statutu, deklaracijama i odlukama centralnih tijela DNZ BiH.

Član 64.

Organ kantonalne/regionalne organizacije DNZ BiH je kantonalni/regionalni odbor. Kantonalni/regionalni odbor može osnovati interesne organizacije i druge organe, ako to nije u suprotnosti sa ovim Statutom.

b) Kantonalni/Regionalni odbor

Član 65.

Kantonalni/regionalni odbor je izvršno-političko tijelo kantonalne/regionalne organizacije.

Kantonalna organizacija se formira u kantonima/regijama u kojima je formirano najmanje 1/3 općinskih organizacija DNZ BiH.

Odluku o formiranju Kantonalnog/regionalnog odbora donosi Predsjedništvo DNZ BiH, a prvom sjednicom do izbora organa, rukovodi predsjednik DNZ BiH.

Kantonalni/regionalni odbor upravlja radom, organizira rad i djelovanje kantonalne/regionalne organizacije.

Članovi Kantonalnog/regionalnog odbora su:

- predsjednici općinskih ogranaka sa područja kantona/regije,
- predsjednici općinskih organizacija,
- imenovani i izabrani dužnosnici u kantonalne i više organe vlasti sa područja kantona/regije,
- predsjednici iteresnih organizacija sa područja kantona/regije,
- članovi centralnih organa stranke sa područja kantona/regije.

Članovi kantonalnog/regionalnog odbora između sebe biraju predsjednika i dva potpredsjednika (po mogućnosti iz reda različitih konstitutivnih naroda).

Predsjednik kantonalnog/regionalnog odbora je po funkciji član Predsjedništva DNZ BiH.

Član 66.

Kantonalni/regionalni odbor iz svoje nadležnosti:

- provodi Program, Statut, te odluke i zaključke viših organa DNZ BiH,
- donosi godišnji plan rada i razmatra izvještaj o realizaciji plana,
- podstiče i koordinira aktivnost i saradnju općinskih organizacija,
- predlaže kandidate za kantonalne skupštine i regionalne organe zakonodavne i izvršne vlasti,
- predlaže kandidate za zastupnike DNZ BiH u Parlamentarnoj skupštini BiH, Parlamentu Federacije BiH, Narodnoj skupštini Republike Srpske i delegate za Skupštinu Distrikta Brčko;
- donosi poslovnik o svom radu;
- donosi odluke, zaključke i preporuke iz svoje nadležnosti.

4. Centralni organi DNZ BiH

Član 67.

Centralni organi DNZ BiH su:

- a) Kongres,
- b) Glavni odbor,
- c) Predsjedništvo,
- d) Predsjednik,
- e) Nadzorni odbor,
- f) Sud časti,
- g) Generalni sekretar i
- h) Portparol.

a) Kongres

Član 68.

Kongres DNZ BiH je najviše programsko, statutarno i izborna tijelo Stranke.
Kongres DNZ BiH čine:

- 1) delegati Kongresa:
 - predstavnici općinskih organizacija DNZ BiH srazmjerno broju članova i drugim kriterijima koje definira Glavni odbor DNZ BiH.
- 2) članovi Kongresa po funkciji:
 - predsjednici općinskih organizacija,
 - predsjednici kantonalnih/regionalnih odbora,
 - članovi centralnih organa iz člana 65. ovog Statuta, izuzev tačke 1,
 - vijećnici općinskih vijeća / odbornici skupština opština, poslanici kantonalnih skupština i zastupnici u Parlamentarnoj skupštini BiH, Parlamentu FBiH, Narodnoj skupštini Republike Srpske, delegati u Skupštini Distrikta Brčko,
 - dužnosnici u izvršnoj vlasti iz reda DNZ BiH na svim nivoima vlasti u BiH.

Član 69.

Nadležnosti Kongresa su slijedeće:

- ustanovljava opću politiku Stranke;
- razmatra, ocjenjuje i zauzima stavove ukupnog djelovanja Stranke;
- donosi, mijenja i dopunjuje osnovna načela DNZ BiH, programska usmjerenja i djelovanja, kao i Statut DNZ BiH;
- usvaja temeljnu rezoluciju Kongresa DNZ BiH kojom se utvrđuje politika Stranke u slijedećem mandatnom periodu, te ostale rezolucije i deklaracije o političkom djelovanju Stranke;
- donosi odluke o prijedlozima upućenim Kongresu od strane organa Stranke;
- donosi Poslovnik o svom radu i druge akte iz svoje nadležnosti;
- odlučuje o usvajanju izvještaja o radu iz prethodnog perioda: Glavnog odbora, Predsjednika stranke, Predsjedništva, Nadzornog odbora i Suda časti;
- bira i razrješava: predsjednika, članove Predsjedništva, članove Nadzornog odbora i Suda časti;
- odlučuje o udruživanju sa drugim političkim organizacijama u slučaju da se udruživanjem stvara nova stranka;
- odlučuje o prestanku rada DNZ BiH;
- obavlja i druge poslove u vez za djelovanjem DNZ BiH.

Član 70.

Kongres DNZ BiH može određene poslove i ovlaštenja prenijeti na Glavni odbor DNZ BiH radi njihova obavljanja između dva zasjedanja Kongresa, osim donošenja Statuta.

Član 71.

Kongres saziva i njime predsjedava do izbora radnog predsjedništva predsjednik/predsjednica DNZ BiH.

Sjednice Kongresa u vidu tematskih konvencija održavaju se prema ukazanoj potrebi, a Izborni kongres svake 4 (četiri) godine i to u roku 90 dana od provedenih općih izbora u Bosni i Hercegovini.

Na zahtjev Glavnog odbora ili najmanje pet kantonalnih/regionalnih organizacija, predsjednik/predsjednica Stranke će sazvati vanrednu sjednicu Kongresa.

Odluku o sazivanju vanredne sjednice Kongresa, donosi Glavni odbor Stranke.

Član 72.

Vanredna sjednica Kongresa, uručivanje dnevnog reda i radnog materijala za sjednicu, mora se sazvati najmanje 15 dana prije zakazanog održavanja.

Vanredna sjednica Kongresa održava se i radi po proceduri redovne sjednice Kongresa.

b) Glavni odbor

Član 73.

Glavni odbor je najviši organ DNZ BiH između dva zasjedanja Kongresa.

Glavni odbor čine:

- izabrani članovi Predsjedništva,
- predsjednici kantonalnih/regionalnih odbora,
- zastupnici i poslanici u Parlamentarnoj skupštini BiH, Parlamentu FBiH i Narodnoj skupštini RS,
- funkcioneri postavljeni u izvršnoj vlasti od nivoa kantonalne/regionalne, entitetske do najvišeg nivoa Bosne i Hercegovine,
- dva člana/članice na prijedlog interesne organizacije mladih Stranke,
- dvije članice na prijedlog interesne organizacije žena DNZ BiH i
- od 5-10 članova/članica DNZ BiH, koje, na prijedlog predsjednika Stranke, bira Predsjedništvo DNZ BiH.

Član 74.

Glavni odbor mora održati konstituirajuću sjednicu najkasnije 60 dana od dana održavanja Izborne sjednice Kongresa.

Konstituirajuću sjednicu Glavnog odbora saziva predsjednik/predsjednica DNZ BiH, a na sjednici se bira predsjednik/predsjednica, dva potpredsjednika/potpredsjednice (po mogućnosti iz reda konstitutivnih naroda) i pomoćna radna tijela Glavnog odbora.

Član 75.

Redovne sjednice Glavnog odbora saziva predsjednik/predsjednica, a u njegovoj odsutnosti jedan od potpredsjednika/potpredsjednica, najmanje svakih šest mjeseci.

Sjednica Glavnog odbora DNZ BiH sazvat će se i na prijedlog predsjednika/predsjednice Stranke ili na prijedlog najmanje 1/5 članova Glavnog odbora.

Član 76.

Ovlaštenja i djelokrug rada Glavnog odbora su slijedeći:

- na osnovu Statuta i programskih dokumenata, donosi odluke i zaključke te daje preporuke predsjedniku DNZ BiH i Generalnom sekretaru Stranke,
- raspravlja o stručnim analizama interesnih odbora i utvrđuje programske smjernice za pojedina područja političkog, ekonomskog i društvenog života,
- odlučuje o povezivanju rada DNZ BiH sa drugim političkim strankama ili nepolitičkim organizacijama te učlanjenju DNZ BiH u međunarodne političke ili nepolitičke organizacije,
- odlučuje o stupanju DNZ BiH u koalicije na razini Bosne i Hercegovine i entiteta i o istupanju iz koalicija,
- kandidira kandidate za izbor zastupnika i poslanika u zakonodavne organe vlasti na nivou entiteta i na nivou Bosne i Hercegovine, te kandidate za članove izvršne vlasti entiteta i Bosne i Hercegovine,
- usvaja finansijski plan i godišnji obračun,
- utvrđuje prijedlog Programa, Statuta i ostalih kongresnih dokumenata i upućuje Kongresu na donošenje,
- donosi odluke o pokretanju postupka izglasavanja nepovjerenja članovima središnjih organa Stranke,
- na prijedlog predsjednika ili Predsjedništva donosi izborni program za opće izbore na nivou entiteta i Bosne i Hercegovine,
- utvrđuje liste kandidata za organe DNZ BiH koje bira Kongres,
- obavlja i druge poslove predviđene Statutom i Poslovnikom.

Član 77.

Način rada i odlučivanja na sjednicama Glavnog odbora regulirat će se Poslovnikom koji se usvaja na prvoj sjednici Odbora.

c) Predsjedništvo DNZ BiH

Član 78.

Predsjedništvo DNZ BiH je najviši političko-izvršni organ Stranke.

Predsjedništvo DNZ BiH čini 15 članova koje bira Kongres (predsjednik, 5 potpredsjednika i 9 članova Predsjedništva).

Članovi Predsjedništva po funkciji su:

- predsjednik/predsjednica Glavnog odbora,
- Generalni sekretar Stranke,
- Portparol stranke,
- predsjednici kantonalnih/regionalnih odbora,
- predsjednici klubova zastupnika/poslanika u predstavničkim domovima na nivou BiH i entiteta,
- predsjednici stranačke asocijacije mladih i žena i
- predstavnici Stranke na višim nivoima izvršne vlasti.

Član 79.

Sjednice Predsjedništva saziva i njima predsjedava predsjednik Stranke, a u slučaju njegove spriječenosti, zamjenjuje ga jedan/jedna od potpredsjednika/potpredsjednica kojeg/koju za to ovlasti predsjednik Stranke.

Odluke Predsjedništva obavezne su za sva niža tijela Stranke, a u slučaju kolizije karaktera tih odluka s odlukama Glavnog odbora DNZ BiH, niža tijela dužna su ih primjenjivati do konačne odluke Glavnog odbora.

Član 80.

Ovlaštenja i nadležnosti Predsjedništva su:

- organizira provođenje ili provodi odluke Kongresa, Glavnog odbora i Predsjedništva;
- koordinira rad kantonalnih/regionalnih organizacija na provođenju politike i Programa DNZ BiH;
- analizira i zauzima stavove o aktuelnim političkim pitanjima;
- osmišljava i organizira provođenje političkih i poslovnih aktivnosti Stranke,
- upravlja Strankom između dvije sjednice Glavnog odbora,
- organizira i provodi kontakte Stranke s javnošću;
- brine se za materijalna i finansijska sredstva potrebna za rad Stranke,
- predlaže Glavnom odboru finansijski plan i godišnji obračun za tekuću godinu,
- osniva interesne organizacije Stranke i koordinira njihov rad;
- donosi odluke o imenovanju izbornih tijela Stranke;
- donosi Pravilnik o unutrašnjoj organizaciji Stručne službe stranke na prijedlog Generalnog sekretara Stranke;
- donosi Poslovnik o radu;
- podnosi izvještaj o svom radu Glavnom odboru između dvije sjednice Odbora;
- donosi odluke koje nisu u nadležnosti drugih organa Stranke i
- obavlja i druge poslove u skladu sa Statutom i Programom DNZ BiH.

Član 81.

Za potrebe obavljanja administrativnih, tehničkih i stručnih poslova, Predsjedništvo Stranke osniva Centralni ured Stranke.

Na prijedlog Generalnog sekretara, Predsjedništvo donosi Pravilnik o organizaciji Centralnog ureda, te broju administrativnih i drugih stručnih radnika za obavljanje poslova u uredu.

Generalni sekretar je po položaju rukovodilac Centralnog ureda.

d) Predsjednik/predsjednica DNZ BiH

Član 82.

Predsjednik/predsjednica DNZ BiH rukovodi Strankom, izvršava i provodi odluke Predsjedništva, te odlučuje o tekućim poslovima vezanim za neposredno rukovođenje Strankom.

Predsjednika/predsjednicu DNZ BiH bira Kongres na mandatni period od četiri godine.

Kandidate za predsjednika/predsjednicu DNZ BiH predlaže Glavni odbor ili najmanje 1/5 delegata Kongresa.

Dužnost predsjednika/predsjednice Stranke i dužnost predsjednika/predsjednice Glavnog odbora su nespojive.

Za predsjednika/predsjednicu DNZ BiH izabran je kandidat/kandidatkinja koji/koja dobije natpolovičnu većinu glasova prisutnih delegata Kongresa.

Ako nijedan kandidat/kandidatkinja ne dobije potrebnu većinu, izbor se ponavlja između dva kandidata koji su dobili najviše glasova.

Izabaran je kandidat/kandidatkinja, koji/koja u drugom krugu glasanja, dobije više glasova.

Član 83.

U slučaju odsutnosti, Predsjednika/predsjednice DNZ BiH zamjenjuje jedan/jedna od potpredsjednika/potpredsjednica, koga/koju ovlasti predsjednik/predsjednica Stranke.

Član 84.

Predsjednik/predsjednica DNZ BiH ima ovlaštenja i nadležnosti:

- da predstavlja i zastupa DNZ BiH u javnom i političkom djelovanju, te u pravnom prometu, u skladu sa zakonom, Statutom i Programom Stranke;
- provodi politiku Stranke u skladu sa programskim dokumentima, Statutom, odlukama i zaključcima Kongresa, Glavnog odbora i Predsjedništva, te u tu svrhu donosi provedbene političke odluke, zaključke i uputstva;
- koordinira i osigurava jedinstvo djelovanja svih organa Stranke;
- po potrebi, saziva predsjednike općinskih i kantonalnih/regionalnih organizacija s ciljem utvrđivanja mjera za efikasno provođenje politike Stranke;
- saziva Kongres u skladu sa Statutom Stranke;
- saziva i rukovodi sjednicama Predsjedništva;
- predlaže Kongresu i Glavnom odboru izbor i opoziv, te potvrdu (saglasnost) izbora odnosno imenovanja članova organa Stranke prema odredbama ovoga Statuta i
- u hitnim slučajevima donosi odluke iz nadležnosti Predsjedništva, s tim što na prvoj sjednici Predsjedništva traži potvrdu tih odluka i zaključaka.

Član 85.

Predsjednik/predsjednica Stranke podnosi izvještaj o svom radu najmanje jednom godišnje Predsjedništvu, a izvještaj o četverogodišnjem radu Kongresu DNZ BiH.

Član 86.

Predsjednik/predsjednica DNZ BiH zadužuje potpredsjednike Stranke za djelatnosti u provođenju pojedinih programskih područja, odnosno za neposredno provođenje politike Stranke konkretnim političkim djelovanjem na državnom i lokalnom nivou.

Član 87.

Predsjednik/predsjednica DNZ BiH može i prije isteka mandata podnijeti ostavku uz pismeno obrazloženje.

U slučaju ostavke predsjednika/predsjednice Stranke ili njegove/njene spriječenosti da dalje obavlja tu dužnost, Glavni odbor određuje jednog od potpredsjednika za vršioca dužnosti predsjednika/predsjednice Stranke.

Član 88.

U organima DNZ BiH će se obezbijediti adekvatna nacionalna i spolna zastupljenost, a imperativno u smislu da među izabranim budu zastupljene žene, mladi i sva tri konstitutivna naroda.

e) Nadzorni odbor

Član 89.

Nadzorni odbor DNZ BiH broji pet (5) članova, koje bira Kongres na period od četiri godine.

Nadzorni odbor na prvoj konstituirajućoj sjednici bira predsjednika/predsjednicu i zamjenika/zamjenicu predsjednika/predsjednice Nadzornog odbora.

Članovi Nadzornog odbora ne mogu biti istovremeno članovi nijednog drugog organa Stranke.

Odluke Nadzornog odbora su obavezujuće za organe ili pojedine članove Stranke na koje se odnosi.

Član 90.

Nadzorni odbor ocjenjuje da li su odluke i rad organa i dužnosnika u skladu sa zakonom i drugim propisima Bosne i Hercegovine, te da li se uredno i namjenski raspolaze sredstvima Stranke.

Izveštaj o finansijsko-materijalnom poslovanju koji se podnose na odobrenje Glavnom odboru, Predsjedništvu ili Kongresu, moraju biti popraćeni mišljenjem Nadzornog odbora.

Član 91.

Nadzorni odbor najmanje jednom godišnje upućuje izvještaj o svom radu Glavnom odboru DNZ BiH.

f) Sud časti

Član 92.

Sud časti na nivou Stranke ima tri člana.

Članovi Suda časti biraju između sebe predsjednika/predsjednicu Suda časti.

Član 93.

Sud časti na nivou DNZ BiH uglavnom rješava po žalbama na odluke sudova časti općinskih ogranaka DNZ BiH.

Odluka Suda časti DNZ BiH donesena po žalbi, konačna je u postupku.

Član 94.

Sudovi časti DNZ BiH djeluju u skladu s Pravilnikom o sudovima časti kojeg donosi Glavni odbor Stranke.

g) Generalni sekretar

Član 95.

DNZ BiH ima Generalnog sekretara.

Generalni sekretar DNZ BiH ima slijedeće nadležnosti:

- učestvuje u pripremi i radu centralnih organa Stranke, te priprema i osigurava organizacione, materijalne i tehničke uslove za njihov rad;
- koordinira rad općinskih, gradskih i kantonalnih organizacija Stranke;
- koordinira rad sekretara općinskih ogranaka;
- zadužen je za unapređenje organizacione strukture Stranke;
- organizira i koordinira ostvarivanje materijalno-financijskog poslovanja u skladu sa Zakonom i aktima Stranke;
- organizira vođenje općih, računovodstvenih i drugih poslova za potrebe organa Stranke;
- izvršava odluke i zaključke organa Stranke;
- obavlja i druge poslove u skladu sa Statutom i odlukama organa Stranke.

Član 96.

Generalnog sekretara bira i opoziva Predsjedništvo na prijedlog predsjednika/predsjednice DNZ BiH.

Član 97.

U slučaju duže odsutnosti ili spriječenosti u obavljanju poslova, generalnog sekretara zamjenjuje član Predsjedništva kojeg odredi predsjednik Stranke.

Za svoj rad, generalni sekretar odgovara predsjedniku i Glavnom odboru Stranke.

h) Portparol DNZ BiH

Član 98.

Za odnose sa javnošću DNZ BiH imenuje portparola na nivou Stranke.

Djelokrug rada, ovlaštenja i odgovornosti portparola regulišu se posebnom odlukom Predsjedništva DNZ BiH.

Član 99.

Portparola DNZ BiH bira i razrješava Predsjedništvo na prijedlog predsjednika/predsjednice DNZ BiH.

VI – ORGANIZACIJA ČLANSTVA DNZ BiH U DIJASPORI

Član 100.

Članstvo DNZ BiH koje privremeno živi i radi u inostranstvu, organizira svoju aktivnost na provođenju Programa Stranke, putem podružnica ili klubova članova i simpatizera DNZ BiH.

Članovi DNZ BiH u dijaspori svoju organizaciju i djelovanje ustanovljavaju na način i po postupku za djelovanje političkih organizacija propisanom zakonima države u kojoj žive i djeluju.

Član 101.

Osnovane podružnice, klubovi ili druge asocijacije članova i simpatizera DNZ BiH u dijaspori, neposredno ostvaruju saradnju na realizaciji programskih ciljeva sa organima Stranke u Bosni i Hercegovini.

Predsjedništvo DNZ BiH iz svog sastava će imenovati osobu za koordinaciju rada sa dijasporom.

Član 102.

Asocijacije članova i simpatizera DNZ BiH u dijaspori svoju aktivnost, odnos i saradnju sa organima Stranke, utvrđju svojim programom djelovanja za tekuću godinu.

VII – IZBORI, KANDIDIRANJE I OPOZIV

Član 103.

Svaki član/članica DNZ BiH može birati i biti biran/birana u organe Stranke na svim nivoima.

Svi organi Stranke biraju se na period od četiri (4) godine.

Izbor za članove organa Stranke obavlja se tajnim glasanjem između više kandidata.

Za tijela Stranke koja čine jedan: predsjednik, sekretar, blagajnik itd. izabrani su kandidati koji dobiju natpolovičnu većinu glasova prisutnih članova.

Za tijela Stranke u koja se bira više članova: Predsjedništvo, Glavni odbor, Nadzorni odbor, Sud časti, delegati u skupštine i delegati za Kongres, izabrani su kandidati koji dobiju najveći broj glasova prisutnih članova, i to redosljedom po broju dobivenih glasova.

Član 104.

Način kandidiranja i postupak biranja određuje Glavni odbor istovremeno s donošenjem Odluke o provođenju redovnih ili prijevremenih izbora za organe Stranke kada to Statutom nije detaljno određeno.

Član 105.

Prilikom kandidiranja i izbora organa Stranke, svi članovi Stranke su jednaki i sa istim pravima, bez obzira na spolnu, nacionalnu, vjersku i drugu pripadnost.

Član 106.

Opoziv pojedinih članova organa Stranke ili organa u cjelini, te njihovu popunu (kada se stvore političko-programski razlozi za to, a uslovljeni su neaktivnošću tijela u cjelini ili pojedinih članova), može izvršiti isključivo ono tijelo koje je te članove ili tijela izabralo, osim u slučajevima kada je Statutom drugačije propisano.

VIII – KANDIDIRANJE I UČEŠĆE U VLASTI

Član 107.

Kandidate DNZ BiH za zakonodavne, predstavničke i izvršne vlasti utvrđuju izvršni organi na odgovarajućem nivou organizovanja Stranke, u skladu s odlukom o načinu predlaganja, izbora i opoziva kandidata, koju donosi Glavni odbor Stranke.

Pripadnici oba spola moraju biti ravnomjerno raspoređeni na kandidatskim listama, u skladu sa Izbornim zakonom BiH.

Zastupnici i nosioci izvršne vlasti

Član 108.

Članovi DNZ BiH u zakonodavnim, predstavničkim i organima izvršne vlasti, stvaralački iniciraju aktivnosti i zauzimaju stavove o svim pitanjima sa stanovišta programskih i drugih stavova Stranke.

Nosioci javnih dužnosti ispred DNZ BiH u svom radu dužni su provoditi programske ciljeve Stranke, te izgrađivati i čuvati vlastiti, javni i politički integritet i ugled Stranke.

Član 109.

Članovi DNZ BiH koji ostvaruju dodatne prihode po osnovu vršenja zastupničkih i drugih dužnosti, obavezni su izdvajati dio tih primanja za rad i razvoj Stranke, u visini i na način utvrđen odlukom Glavnog odbora Stranke.

Klubovi zastupnika i vijećnika

Član 110.

Zastupnici i vijećnici DNZ BiH osnivaju klubove zastupnika, odnosno vijećnika s ciljem usklađivanja svog djelovanja, zauzimanja stavova i vođenja parlamentarne aktivnosti.

Član 111.

Članovi kluba zastupnika odnosno vijećnika DNZ BiH na prijedlog nadležnog organizacionog oblika biraju predsjednika i zamjenika predsjednika kluba iz svojih članova.

Predsjednik kluba zastupnika, odnosno vijećnika DNZ BiH, rukovodi radom kluba i dužan je redovno izvještavati organe Stranke odgovarajućeg nivoa organiziranja o radu kluba.

Organ Stranke iz prethodnog stava dužan je razmotriti sva pitanja koja iznese klub i zauzeti svoj stav.

Klub zastupnika, odnosno vijećnika, donosi poslovnik o svom radu.

Član 112.

U radu kluba zastupnika, odnosno vijećnika DNZ BiH učestvuju nosioci izvršne vlasti ispred Stranke odgovarajućeg nivoa organizovanja, a po potrebi i predstavnici organa Stranke.

S ciljem provođenja programskih i političkih inicijativa nadležni organ DNZ BiH, kao i nosioci izvršne vlasti ispred Stranke, mogu inicirati sastanak kluba zastupnika, odnosno

vijećnika radi zauzimanja zajedničkih stavova prije istupanja na sjednici organa zakonodavne ili izvršne vlasti.

Koordinacija učesnika u vlasti

Član 113.

Predsjedništvo DNZ BiH koordinira rad klubova zastupnika na državnom i entitetskim nivoima, kao i rad nosioca dužnosti u izvršnoj i zakonodavnoj vlasti, održavanju sjednica uz učešće predsjednika kluba zastupnika i nosioca dužnosti u zakonodavnoj i izvršnoj vlasti.

Predsjedništvo kantonalne/regionalne organizacije i Distrikta Brčko, odnosno predsjedništvo općinskog ogranka, koordiniraju rad klubova zastupnika, odnosno vijećnika, održavanjem zajedničkih sjednica s ciljem ostvarivanja politike i pokretanja inicijativa DNZ BiH.

Za potrebe koordiniranog rada i saradnje predstavnika DNZ BiH u zakonodavnoj i izvršnoj vlasti Predsjedništvo DNZ BiH može utvrditi i druge oblike koordinacije.

IX – STRANAČKA DISCIPLINA

Član 114.

Osnovna stranačka disciplina predstavlja izvršavanje dužnosti utvrđenih ovim Statutom, Programom, dokumentima Kongresa i odlukama organa Stranke, te pridržavanje općih pravila uljudnog ponašanja.

Nepridržavanjem pravila takvog ponašanja, član/članica ugrožava interese Stranke, što se razmatra i utvrđuje pred Sudom časti.

Član 115.

Za nepridržavanje pravila stranačke discipline, članu/članici se može izreći mjera suspenzije ili isključenja iz Stranke.

Odluku o suspenziji donosi predsjednik općinske organizacije, a odluku o isključenju donosi Sud časti nakon provednog postupka.

Član 116.

Stranačka disciplina i rad sudova časti, konkretnije se regulišu Pravilnikom koji donosi Glavni odbor.

X – IMOVINA I MATERIJALNO-FINANCIJSKO POSLOVANJE STRANKE

Član 117.

Imovinu DNZ BiH čine nekretnine i pokretne stvari, sredstva na računima, kao i druga prava u vlasništvu Stranke.

Nekretnine se mogu sticati ili otuđivati samo po odluci Glavnog odbora Stranke.

Član 118.

DNZ BiH ostvaruje sredstva za financiranje u skladu sa odredbama Zakona o financiranju političkih partija u BiH.

Član 119.

S ciljem obezbjeđivanja materijalnih sredstava za osnovno funkcionisanje Stranke, Glavni odbor, a na prijedlog općinskih organizacija, odlukom utvrđuje kriterije i način sticanja, raspolaganja, upravljanja i korištenja materijalnih sredstava Stranke.

Glavni odbor svojom odlukom određuje da li će se finansijsko poslovanje obavljati sa jednom ili više poslovnih banaka, sa jednim ili više računa.

Član 120.

Visinu članarine, način prikupljanja, uslove za oslobađanje od plaćanja, kao i način raspodjele sredstava članarine, određuje Glavni odbor posebnom odlukom na prijedlog Predsjedništva Stranke.

Blagajnik svakog nivoa organizacije, dužan je da redovno prati ispunjavanje obaveza plaćanja članarine i o tome obavještava rukovodstvo Stranke.

Član 121.

Dobrovoljne priloge, poklone i zavještanja DNZ BiH će prihvatiti pod uslovom da to nije u suprotnosti sa Zakonom o sukobu interesa i Zakonom o finansiranju političkih stranaka.

Za davanje saglasnosti o prihvatanju ovih prihoda, nadležno je rukovodstvo organizacije u kojoj je poklon, dobrovoljni prilog ili zavještanje učinjeno, a ako se radi o nekretninama, nadležan je Glavni odbor Stranke.

Dobrovoljni prilozi i donatorstva se posebno evidentiraju, a organi DNZ BiH javno se upoznaju o donatorima na sjednicama.

XI – STATUT I DRUGI AKTI STRANKE

Član 122.

Statut je najviši normativni akt kojim se uređuje unutrašnja organizacija i upravljanje u Stranci.

Statut se donosi i uređuje pitanja propisana Zakonom o političkim organizacijama i ovim Statutom.

Član 123.

Postupak donošenja Statuta i njegovih izmjena i dopuna, mogu pokrenuti članovi ili organi stranke sa obrazloženjem.

Prijedlozi u smislu stava 1. ovog člana dostavljaju se Predsjedništvu Stranke koje je dužno očitovati se o svakom prijedlogu i o tome obavijestiti predlagača.

Član 124.

Predsjedništvo Stranke osniva Komisiju za Statut koja izrađuje nacrt Statuta, odnosno nacrt izmjena i dopuna Statuta.

O nacrtu Statuta, odnosno o nacrtu izmjena i dopuna Statuta, organizira se javna rasprava u općinskim i kantonalnim/regionalnim organizacijama.

Primjedbe i prijedlozi iz javne rasprave dostavljaju se Glavnom odboru koji utvrđuje Prijedlog Statuta.

Statut, te izmjene i dopune Statuta, donosi Kongres Stranke.

Član 125.

Organi Stranke donose, u skladu sa svojim ovlaštenjima i nadležnostima utvrđenim Statutom, odluke, zaključke, preporuke i uputstva.

Odlukom se, na opšti način, uređuju pitanja provedbe pojedinih odredaba Statuta.

Zaključkom se uređuju konkretna pitanja iz nadležnosti organa Stranke, a preporukom i uputstvom se uređuje postupanje organa u Stranci o pojedinim pitanjima.

XII – PRESTANAK RADA STRANKE

Član 126.

DNZ BiH prestaje na način i pod uslovima propisanim Zakonom o političkim organizacijama („Sl. list RBiH“ br. 27/91), kao i na osnovu odluke Kongresa Stranke.

Član 127.

U slučaju prestanka rada Stranke, njena imovina će pripasti nevladinoj i nepolitičkoj organizaciji koja se bavi zaštitom temeljnih ljudskih prava, a djeluje na području na kojem je imala sjedište Stranka.

XIII – PRIJELAZNE I ZAVRŠNE ODREDBE

Član 128.

Ovaj Statut stupa na snagu danom donošenja, čime prestaje važenje postojećeg Statuta DNZ BiH.

Organizacije DNZ BiH dužne su uskladiti svoju organizaciju u roku 90 dana od dana stupanja na snagu ovog Statuta.

U Velikoj Kladaši, 01.10.2005. godine

Izborna skupština DNZ BiH